## Tam O' Shanter

When chapman billies leave the street, And drouthy neibors, neibors, meet; As market days are wearing late, And folk begin to <u>tak</u> the gate, While we sit bousing at the nappy, An' getting fou and unco happy, We think na on the lang Scots miles, The mosses, waters, slaps and stiles, That lie between us and our hame, Where sits our sulky, sullen dame, Gathering her brows like gathering storm, Nursing her wrath to keep it warm.

This truth fand honest Tam o' Shanter, As he frae Ayr ae night did canter: (Auld Ayr, <u>wham</u> ne'er a town surpasses, For honest men and bonie lasses).

O Tam! had'st thou but been sae wise, As taen thy ain wife Kate's advice! She tauld thee weel thou was a skellum, A blethering, blustering, drunken blellum; That frae November till October, Ae market-day thou was na sober; That ilka melder wi' the Miller, Thou sat as lang as thou had siller; That ev'ry naig was ca'd a shoe on The Smith and thee gat roarin' fou on; That at the Lord's house, ev'n on Sunday, Thou drank wi' Kirkton Jean till Monday, She prophesied that late or soon, Thou wad be found, deep drown'd in Doon, Or catch'd wi' warlocks in the mirk, By Alloway's auld, haunted kirk.

Ah, gentle dames! it gars me greet, To think how mony counsels sweet, How mony lengthen'd, sage advices, The husband frae the wife despises!

But to our tale: Ae market night, Tam had got planted unco right, Fast by an ingle, bleezing finely, Wi reaming sAats, that drank divinely; And at his elbow, Souter Johnie, His ancient, trusty, drougthy crony: Tam <u>lo'ed</u> him like a very brither; They had been <u>fou</u> for weeks thegither. The night drave on wi' sangs an' clatter; And aye the ale was growing better: The Landlady and Tam grew gracious, Wi' favours secret, sweet, and precious: The <u>Souter tauld</u> his queerest stories; The Landlord's laugh was ready chorus: The storm without might <u>rair</u> and rustle, Tam did na <u>mind</u> the storm a whistle.

Care, mad to see a man sae happy, <u>E'en</u> drown'd <u>himsel amang</u> the nappy. As bees <u>flee hame</u> wi' lades o' treasure, The minutes wing'd their way wi' pleasure: Kings may be blest, but Tam was glorious, O'er a' the ills o' life victorious!

But pleasures are like poppies spread, You seize the flow'r, its bloom is shed; Or like the snow falls in the river, A moment white-then melts for ever; Or like the Borealis race, That <u>flit</u> ere you can point their place; Or like the Rainbow's lovely form Evanishing amid the storm. -Nae man can tether Time nor Tide, The hour approaches Tam maun ride; That hour, o' night's black arch the key-stane, That dreary hour he mounts his beast in; And sic a night he taks the road in, As ne'er poor sinner was abroad in.

The wind blew as 'twad <u>blawn</u> its last; The rattling showers rose on the blast; The speedy gleams the darkness swallow'd; Loud, deep, and lang, the thunder bellow'd: That night, a child might understand, The <u>deil</u> had business on his hand.

Weel-mounted on his grey mare, Meg, A better never lifted leg, Tam skelpit on thro' <u>dub</u> and mire, Despising wind, and rain, and fire; Whiles holding fast his <u>gude</u> blue bonnet, Whiles <u>crooning</u> o'er some auld Scots sonnet, Whiles glow'rin round wi' prudent cares, Lest bogles catch him unawares; Kirk-Alloway was drawing nigh, Where ghaists and houlets nightly cry.

By this time he was cross the ford, Where in the <u>snaw</u> the <u>chapman</u> smoor'd; And past the birks and meikle stane, Where drunken Charlie <u>brak's</u> neck-bane; And thro' the whins, and by the cairn, Where hunters <u>fand</u> the murder'd bairn; And near the thorn, <u>aboon</u> the well, Where Mungo's <u>mither</u> hang'd hersel'. Before him Doon pours all his floods, The doubling storm roars thro' the woods, The lightnings flash from pole to pole, Near and more near the thunders roll, When, glimmering thro' the groaning trees, Kirk-Alloway seem'd in a bleeze, Thro' ilka <u>bore</u> the beams were glancing, And loud resounded mirth and dancing.

Inspiring bold John Barleycorn! What dangers thou canst make us scorn! Wi' tippenny, we fear nae evil; Wi' usquabae, we'll face the devil! The <u>swats sae</u> ream'd in Tammie's noddle, Fair play, he car'd na deils a boddle, But Maggie stood, right <u>sair</u> astonish'd, Till, by the heel and hand admonish'd, She ventur'd forward on the light; And, wow! Tam <u>saw</u> an <u>unco</u> sight!

Warlocks and witches in a dance: Nae cotillon, brent new frae France, But hornpipes, jigs, strathspeys, and reels, Put life and mettle in their heels. A winnock-bunker in the east, There sat auld Nick, in shape o' beast; A towzie tyke, black, grim, and large, To gie them music was his charge: He screw'd the pipes and gart them skirl, Till roof and rafters a' did dirl. -Coffins stood round, like open presses, That shaw'd the Dead in their last dresses; And (by some devilish <u>cantraip</u> sleight) Each in its cauld hand held a light. By which heroic Tam was able To note upon the haly table, A murderer's banes, in gibbet-airns; Twa span-lang, wee, unchristened bairns; A thief, new-cutted frae a rape, Wi' his last gasp his gabudid gape; Five tomahawks, wi' blude red-rusted: Five scimitars, wi' murder crusted; A garter which a babe had strangled: A knife, a father's throat had mangled. Whom his ain son of life bereft, The grey-hairs yet stack to the heft; Wi' mair of horrible and awfu', Which even to name wad be unlawfu'. Three lawyers tongues, turned inside oot, Wi' lies, seamed like a beggars clout, Three priests hearts, rotten, black as muck, Lay stinkin, vile in every neuk.

As Tammie glowr'd, amaz'd, and curious, The mirth and fun grew fast and furious; The Piper loud and louder blew, The dancers quick and quicker flew, The reel'd, they set, they cross'd, they cleekit, Till ilka carlin <u>swat</u> and reekit, And <u>coost</u> her <u>duddies</u> to the wark, And linkit at it in her sark!

Now Tam, O Tam! had they been queans, A' plump and strapping in their teens! Their sarks, instead o' <u>creeshie</u> flainen, Been snaw-white seventeen <u>hunder</u> linen!-<u>Thir breeks</u> o' mine, my only pair, That <u>ance</u> were plush o' <u>guid</u> blue hair, I wad <u>hae gien</u> them off my hurdies, For ae <u>blink</u> o' the bonie burdies! But wither'd beldams, <u>auld</u> and droll, <u>Rigwoodie</u> hags wad <u>spean</u> a foal, Louping <u>an' flinging</u> on a crummock. I wonder did na turn thy stomach.

But Tam kent what was what fu' brawlie: There was ae winsome wench and waulie That night enlisted in the core, Lang after ken'd on Carrick shore; (For mony a beast to dead she shot, And perish'd mony a bonie boat, And shook baith meikle corn and bear, And kept the country-side in fear); Her cutty sark, o' Paisley harn, That while a lassie she had worn, In longitude tho' sorely scanty, It was her best, and she was vauntie. Ah! little ken'd thy reverend grannie, That sark she coft for her wee Nannie, Wi twa pund Scots ('twas a' her riches), Wad ever grac'd a dance of witches!

But here my Muse her wing <u>maun</u> cour, <u>Sic</u> flights are far beyond her power; To sing how Nannie <u>lap</u> and flang, (A <u>souple</u> jade she was and strang), And how Tam stood, like <u>ane</u> bewithc'd, And thought his very <u>een</u> enrich'd: Even Satan glowr'd, and fidg'd <u>fu'</u> fain, And <u>hotch'd</u> and blew wi' might and main: <u>Till</u> first ae caper, <u>syne</u> anither, Tam <u>tint</u> his reason a thegither, And roars out, "Weel done, Cutty-sark!" And in an instant all was dark: And scarcely had he Maggie rallied. When out the hellish legion sallied.

As bees <u>bizz</u> out wi' angry fyke, When plundering herds assail their byke; As open pussie's mortal foes, When, pop! she starts before their nose; As eager runs the market-crowd, When "Catch the thief!" resounds aloud; So Maggie runs, the witches follow, Wi' mony <u>an eldritch skreich and hollow</u>.

Ah, Tam! Ah, Tam! thou'll get thy fairin! In hell, they'll roast thee like a herrin! In vain thy Kate awaits thy comin! Kate soon will be a woefu' woman! Now, do thy speedy-utmost, Meq, And win the key-stone o' the brig;  $^{1}$ There, at them thou thy tail may toss, A running stream they dare <u>na</u> cross. But ere the keystane she could make, The fient a tail she had to shake! For Nannie, far before the rest, Hard upon noble Maggie prest, And flew at Tam wi' furious ettle; But little wist she Maggie's mettle! Ae spring brought off her master hale, But left behind her ain grey tail: The carlin claught her by the rump, And left poor Maggie scarce a stump.

Now, <u>wha</u> this tale o' truth shall read, <u>Ilk</u> man and mother's son, take heed: Whene'er to Drink you are inclin'd, Or Cutty-sarks <u>rin</u> in your mind, Think ye may buy the joys o'er dear; Remember Tam <u>o'</u> Shanter's mare.